

COMUNIDAD

Minister di Cultura Xiomara Maduro a entrega reconocimiento na famia pa Etty Toppenberg



Na final di su discurso na Plaza Nicky Habibe Jr. durante e evento Homenaje na Etty, Minister Maduro a yama famia Toppenberg padilanti pa acepta un muestra di aprecio, un reconocimiento di Gobierno di Aruba pa medio di Minister di Cultura pa Etty Toppenberg.

E reconocimiento ta bisa lo siguiente: “Danki pa deleita, mantene y promove nos musica pa mas di 65 añe y asina yuda

tene nos herencia cultural bibe”.

Na mes momento e mandatario a entrega un boeket di flor pa wordo entrega na sra. Corma Toppenberg, casa di Etty. E publico presente a keda masha contento y den fin di siman tur caminda por a scucha e reaccion den comunidad cu e reconocimiento ta uno bon mereci.



Minister di Cultura Xiomara Maduro – Homenahe na Etty Toppenberg:

Etty stima Pais Aruba y su barrio di Companashi

Etty stima su barrio Companashi, e barrio cu a mire nace, crece y desaroya su mes como un di e talentonan musical grandi di nos Pais. Etty ta masha orguyoso di su barrio, Companashi4ever y cu orguyo Etty ta skirbi riba su pagina di facebook cu Companashi e barrio mas chikito di Aruba cu a ricibi mas medaya di merito di Cas Real. Como artista di nos Pais Aruba, Etty a gana cariño y aprecio di nos tur. Su trayectoria den mundo di musica ta impresionante. Etty ta bay den historia como prome cantante Arubiano cu a presenta nos Himno Nacional, Aruba Dushi Tera' den e ceremonia inaugural di nos Status Aparte, na momento cu Aruba a bira Pais, net despues di 12'or di marduga dia 1 di januari 1986.



Etty hunto cu su amigonan Eric Escalona y Max Hassel a forma e popular 'Trio Huasteca' y hunto cu e Trio aki, Etty a pone su bos y Aruba su nomber resona dos biaha den e prestigioso Festival OTI de la Cancion, un logro cu te awe Pais Aruba ta hopi orguyoso di dje.

Etty y Trio Huasteca tabata un di e pioneronan den turismo, cu a traha hopi duro pa promove Aruba den exterior. Tambe Trio Huasteca tabata ricibi hopi invitacion tanto local como internacional pa deleita publico cu nan cancionnan y musica. Asina Etty a representa nos Pais Aruba varios biaha den exterior, cantando y entreteniendo y na mes momento promove nos dushi Pais.

